

CICIKOANBÁDIEGU

BULICINA FASO

Ti baa dógú pò, li yaa dani kúuma, ti baa paadí

GUFENEMA MASOAGINDO

**BÀALÓ KOANBÁLA TÁÁNLI
JÁGA DOAGIDIMA**

(PP-G N°019-2026)

Pengidiwende Silibeedi WEDIRAWOGO

Wagidugu, li binli 2026 Ciluoba dana 04

Báaló Koanbála táánli den kàli Wagidugu
nani ban mááni ki tiédi màamà dana lele kúli,
li binli 2026, cimuu dana 04, alaamuda daali
ki cili leeri 9 yogunu ki ban gbeni leeri 12 leni miniti 21,
Kapitenni Ibirayimi TARAWORE, yua n tié ti Diema Yudanciamo
leni a Koanbála Táánli Lìgìyúa n den gobidi laa táánli.

A Koanbála Táánli den noanli li daali máyùla nni
ki tàà a jága, ki púni u làabáalu,
ki dini bi niba a bála li tuonli pò,
ki bàà ban dindi yua yaa báli,
ki púni u sànú bi niba n gedi dietoama nni ti diema yèli pò.

LA JAGA

I.1. YAA KOANBADIEGU N DIE TI DIEMA TINBUONA GOBIDIMA LENI A SANCENA TUONA KANI.

A Koanbála Táánli táá **másienkaama tila lie (02)**.

Mi másienkaama tikpiali waani mi diema komininba n da màamà leni kominni kuli n tie yaa buolu càgìli.

Li tie yaa másienkaama tili n bua ki teni li báli máama tili yaali n den táá li binli 2025, piiga n cilie dana 30 ke li lanba n°024-2025/ALT, ki waani mi diema tinbuona po yaa báli máama n ye n tieni nani lan bili máama.

Laa báli máama waani ke kominninba buoli càga tuugi leni kominni kuli n baa fidi ki kuani li yuli po yaa ligi. Laa báli máama bili ke kominni kuli n tie yaa buolu càgìli yegi leni lin fidi ki kuani yaa ligi li yuli pò li binli 2023 leni 2024 leni li niba táánma coalì n da màamà.

Kominninba n da màamà leni kominni kuli buolu n tie màamà nne :

- kominni kobilie (200) n tie a kominnibila ya yaa ligi n kan fidi ki soani mi findima tuona kuli;
- kominni kobiga n piina n bonbiyia (149) n tie a kominniciama ya yaa ligi n baa fidi ki soani mi findima tuona kuli ;
- kominni lie (02) n tie yaa kominninba n gagidi ki yaba ki cie.

Mine másienkaama tili tááama baa teni ti diema nni ban fidi ki bandi kominba buoli coalì n da màamà ke li tuugi leni li báli màamà yaama n den táá li binli 2025, piiga n cilie dana 30 ke li lanba n°024-2025/ALT, ki waani mi diema tinbuona po yaa báli máama n ye.

Mi másienkaama tilieli waani komnninba buoli lebidima sanbila.

Li tie yaa másienkaama tili n bua ki teni li báli máama tili yaali n den táá li binli 2025, piiga n cilie dana 30 ke li lanba n°024-2025/ALT, ki waani mi diema tinbuona po yaa báli máama n ye n tieni nani lan bili máama.

Laa másienkàama tili bili ke :

- mi diema nni a dojaana ligi càgili ban yi yaali ONAFILI yeni n baa yen biigi u yoguntiamu ki bandi kominni kuli ligi n da màamà ;
- kominninba ligikuake leni yaa ligi n ñani a tuona soanma po bina taa puoli tili n baa yaa tie ban baa ñii yaali yaa po ki biigi ki bandi kominni n kuani o yùcèli po yaa ligi n da màammà;
- a koanbála táánli n yen baa táá mi másienkàama tili ki waani yaa kominno n pundi ki lebidi càgili;
- bi yen baa biigi ki bandi kominninba ligicele n fii màamà ban kaani mi diema nni koninniba gobidima càga yaa yogunu bina táa siiga kuli, ke kominni mo kuli go pia u sanu ki lebidi lin tie yaa càgili buolu. ;
- kominnini kuli pia u sanu ki waani Bàaló bujjadiedi ke waa tùó ban sieni o yaa càgili kani.

Yaa másienkaama tili n tie ne baa teni ban gagidi ki waani a tinbuona buoli càga sanbila lan todi kominni kuli n fidi ki yaa kuandi o yùcèli pò yaa ligi n dagidi mi findima tuona soanma po.

I.2. YAA KOANBADIEGU N DIE U LOAGU LENI I LIGI KUBIMA TUONA KANI.

A Koanbála Táánli táá **másienkaama tila (02).**

Mi másienkàama tikpiali waani Bàaló bujjalo, Bàaló bujjala duoga leni Bàaló ligikubila tuona n baa teni ban gagidi ki bàà yaa ligi leni yaa todima mabilikaama tili.

Li tie yaa másienkaama tili n bua ki teni li báli máama tili yaali n den táá li binli 2025, piiga n cilo dana 21 ke li lanba tie n°019-2025/ALT, ki waani Bàaló bujialo mabilikaama tili po yaa báli máama n ye n tieni nani lan bili máama.

Li boncànla yaala n tugi yuli mine másienkàama tili nni tie ki teni yaa tuonsoaba n pugidi ki tie todikaaba, Bàaló ligikubila leni Bàaló bujialo duogili n bàà bi tuona n baa teni ban gagidi ki bàà yaa ligi leni yaa todima.

Mine másienkàama tili táama baa teni ban waani Bàaló bujialo, o ciciduogili, Bàaló bujiala duoga leni Bàaló ligikubila tuona n baa teni ban gagidi ki bàà yaa ligi leni yaa todima n baa yàa dani màamà.

Mi másienkàama tilieli guani ki pandi mi diema nni i ligi làabáalitenma càgili (SENTIFI) nni niyendo báli.

Li tie yaa másienkàama tili n bua ki teni yaa másienkàama tili n den táá li binli 2019, ciyia dana 12 ke li lanba tie n°2019-0878/PRES/PM/MINEFID/MSECU/MJ ki waani mi diema nni i ligi làabáalitenma càgili tuona n tie ya, li boginma leni lin baa yaa cuoni màamà, n bili yàala n tieni.

Laa másienkàama tili táama baa teni ban guani ki pandi o joa **Pieli Laguni ZALA**, o lanba li tuonli nni tie **111 447 J**, ki tie polisinba Komiseerigbengili, báli wan yaa baa ki tie mi diema nni i ligi làabáalitenma càgili yua, o bájuodi kaali bina táa (03) po.

I.3. LI GUUNLI KOANBADIEGU KANI

A Koanbála Táánli táá **tiwaankaali yenli** ke li tuugi leni laa koanbadiegu yuceli po ban gagidi ki baa soani yaa tuona.

Laa tuongagidi kaana bua ki pugini mi diema nni li guunli jakoanda yaaba n ye a tinbuona kuli nni paalu.

Laa tuona tie :

- ki bàà yaa tiadi n gagidi ki bua mi diema jakoanda yaaba n ye mi diema tinmu tugu nni piama guunli càgili (ONASIMI) nni po;
- Ki bàà mi diema nni li sancenli guunli (ONASERI) tuonsoancàgili po li guunli tuonsoantiadi;
- Ki bàà mi diema nni polisinba tuona bangima cogidieli (ENEPI) cogibila po li guunli tuonsoantiadi leni li tuonsoantiayiekaadi;
- ki bàà mi diema nni polisinba tuonsoandieciangu (DESEPENI) tuonsoanba po ti tuonsoantiayiekaadi;
- ki bàà mi diema nni gadeforenba tuonsoandieciangu (DESEFI) tuonsoanba po ti tuonsoantiayiekaadi ;
- ki bàà birigadi laabali càgili tuonsoanba po ti tuonsoantiayiekaadi ;
- ki bàà Polisinba tuona cogidiecianli cogibila po ti tuonsoantiayiekaadi.

Laa tuona kuli ligi táama fii **miliyaari bonbimuu leni miliyon bonbikobilele n piitaa n bilele n tuda kobiga n piitaa n tuda taa n kobiga n piitaa n kuumu lie (K 5 737 133 132) Seefa ligi nni.** Laa ligi baa ña Bàalo ligikpagu nni li binli 2026 tuona soama po.

I.4. LI LAAFIALI KOANBADIEGU KANI

A Koanbála Táanli táá **tiwaakaali yenli** ke li tuugi leni laa koanbadiegu yuceli tuona soanma po miabu.

Li tie yaa tuongagikaana n baa teni ku koanbadiegu n bàà tonma yaala n bua bi niba laafialo po. Lani n tie :

- a logitodiena maama Bulicina Faso nni yi kaani boncianla nni ;
- ti tuonsoantiadi buoli bààma a logitodiena po.

Laa tuona ligi kuli táama tie **miliyaari piilie n binaa leni miliyon kobiluoba n piilele n yendo n kobyia n tuda lele n kobiga n piinii n tudiyenli n kobinaa**

n piiluoba n kuumuu lie leni falininba nii (K 24 671 181 462,8) Seefa ligi nni. Laa ligi baa ña Bàalo ligikpagu nni li binli 2026 tuona soama po.

I.5. U BAADOGU MAAMA TUONA KOANBADIEGU KANI

A Kombála Táánli tàà **másienkaama tili yenli** ki waani Bulicina Faso dógi n tie yaala leni yin tie màamà.

Bulicina Faso dógi yabidi ki pugidi, mi lebidima tiendi a tinbuona nni boncianla lani yaa po, li pundi ban yaa faami li guunli po, bi niba coali n pugidi màamà leni bi loagi tuona po. Laa bonla teni ke i dociami nni, mi fanma leni bi niba n tuuni leni mi tinfanma màamà po pundi ban tieni bonginpanli mi gobidima nni.

Laa másienkaama tili ba todi ban waani u dogu n tie yaala kelima hali li binli 2008 ban den ñani yaa mábilikaama mi diema nni a diegbenga leni i dociami findima tuona po kpeligi ki pendi ki náá ji tuugi leni moala mi yema n tie màamà po.

Laa másienkaama tili n bili màamà, ban ba yini yaala dogu tie:

- Ya kominno nni ke a tuona cuoni, yaa kominno n ye yaa yogunu kuli, ke o niba coali pundi niba 15 000, ki pia mi ñinñanma, kuuran tuonjaana, leni i sani li cenli po, ki go pia a tuonsoanjaana buoli leni li bontagikaala tuonsoankaani;
- Yaa kominno n tie porovensi kaanjigi kuli;
- Ya kominno nni ke a tuona cuoni kaanjigi nni leni o niba coali n da màamà kuli.

Yaala n pugidi, mi másienkaama tili bili ke i dogi ye buoli taa yo. Lani n tie i dociami, yaa dogi n cegidi leni mu dogibimu.

Laa másienkaama tili táama ba todi Bàalo leni kominninba n bàà mábilikapanma mi diema nni a diegbenga leni i dociami findimoanma tuona po.

I.6. YAA KOANBADIEGU N DIE A BIWAALA COGU, TI MAAMAAMAAMA COGU LENI TI DIEMA MABUOLI FINDIMA KANI

A Kombála Táánli tàà **tiwaankaali yenli** ke li tuugi leni Bàaló tuonsoankaana pianli miabu, yaa koanbadiegu n die a biwaala cógú, ti máamaamáama cógú leni ti diema mábuoli findima tuongagidikaana po.

Laa tuongagidikaana tie a diegbenga maama yaala n tie tuoncàgili n tuuni u cogu ñamu puginma leni li juunli mi yepaama nni (REPERI) po. Li tie diegbenga 15 maama yaa n tie tuanma taa ban yi ya R+3 Bulicina Faso porovensinba 15 nni.

Laa tuoncàgili po, ban baa ñani yaa ligi kuli táánma tie **miliyaari piilie n yendo (21 000 000 000) seefa ligi nni.**

II. I LÀABÁALITENKE

II.1. Yaa koanbali n diidi bu kpaabu, mi ñima, li yanwubili leni mi ñima nni bonpiakàala tuona puni a Koanbála Táanli yaa làabáalu n tuugi leni li ñandunli nni u loagu kubima tuona taancianli mi taabuama 17 po ban yi yaali « Risi-Isilaami Dogi » ke li den tieni li binli 2026 cimuu o dana 10 ki gedi o dana 18 daali Kasan pó, Risi diema nni.

Laa taancianli tie li ñandunli nni naankani ke bi baa juogi u loagu, politikiki, ku màásùagu leni mi banma tuona findima po, lani n tie Risi Diema leni isilaami dogi li ñandunli nni siiga.

Kasan taancianli den todi ke Bulicina Faso tonda pugini ku danligu gbamanu ti Diema leni Risi yaa Diema siiga yaala n tie bu kpaabu, mi ñima, ti yandi leni mi ñima nni bonpiakaala tuona nni. Li go den todi ke bi doagidi Bulicina Faso n pia yaa kpaangu ki go pugini laa kpaangu paalu.

II.2. Yaa koanbali n die ti diema leni dietoama siiga ñantaadi puni a Koanbála Táanli yaa làabáalu n tuugi leni li taancianli « u loagu kubima leni li baali tuona taancianli Bulicina Faso nni » n den cuoni màamà. Li den tieni li binli 2026 cimuu o dana 8 ki gedi o dana 10 Sinni Diema nni.

Yaaba n den bogini laa taancianli tie Bulicina Faso saliwuudidiegu Sinni po, Luansu tinbuoli (Hebeyi porovenso) leni Asii diema nni u kpendu leni u loagu kubima tuonsoandiegu.

Ban den lingi yaala laa taancianli nni tie ki doagidi ki waani ti diema nni li baali tuona leni ti diema n pia yaa tuginma leni Sinni nni, li baali tuonsoanba ; ki waani ti diema loagu n jagi yaa tuoncaga yaa po leni Gufenema n bua yaa tuona soanma tontoni po.

Li taanli puoli, bani leni Sinni cagili den taani ki ñii li tili ki tuo a tiina bontagikaala tuonsoandiegu luodima Bulicina Faso nni, li bonla tienkaanu (ti singbandi) tuonsoandiegu, yaa tienkaanu ke bi ba tagi leni a tana, ki yaa tendi i ñè ki go tuo ban yaa todi sudiiri tuona kuñima tuonsoantiadi.

II.3. Yaa koanbali n die a cogibigbenga cógú leni mi bancanma linginma tuona puni a Koanbála Táanli yaa làabáalu n tuugi leni Bulicina Faso iniverisiteenba bonñuadikàala leni li màásùagu jeliti danleleeda badu boginma . Li baa tieni li binli 2026 ciluoba o dana 7 ki gedi o dana 17 daali Dedugu Bankuyi désiyon nni.

U badu Yudaano tie ti lielo li Cici koanbali, Gufenema Yudaano. Ban ñani yaa máyùli Bulicina Faso iniverisiteenba bonñuadikàala leni ku màásùagu jeliti danleleeda badu po tie : **« ku màásùàgu ñalimanbuoli leni mi dobuama moandili : iniverisite nipanba n soani bi niba siiga taayenamu po ».**

Laa badu li binli 2026 po, bi bogini a tuona boncianla nannani mi biigima li bonñuadikàala jeliti po, ti faajijeli po, li saamantuonli po taancianli leni a tadima gbanansaagu jelibuoli. Yaa iniverisite cogibila n baa cua laa badu po coali tie 1200 ki baa ña Bàalo leni bonceli iniverisitenba bonbi 30 nni Bulicina Fasonni.

II.4. A bicegidikàana cógú leni mi tuonsoanbangima koanbali taa mi máama yaa koanbali n die ku gbanansaagu jeliti tuona, bi nipanba leni a tuona bààma yeli nni ki teni a Koanbála Táanli **laabaali taa (03):**

- **I laabaali kpiali** tuugi leni petanki jeligu badiciamu Wagidugu mi taabuama 3 po. Li baa tieni li binli 2026 ciluoba o dana 23 ki gedi o dana 28 daali.

Laa badiciamu po, Afidiki dogi 13 den ba taani ku jeligu nni. Li baa todi Bulicina Faso yèli n ña ki pundi i kaani boncianla li ñandunli nni ku gbanansaagu jelibuoli tuona nni, ki go findi petanki jeligu mi diema nni.

Petanki jeligu badiciamu Wagidugu boginma tie yaala n ba todi mi diema yaaba n puni bi yula petanki jeligu po ban pugini bi banma ki go todi nitoaba mo n doagidi bi yula leni bi buama laa jeligu po. Laa badiciamu ba todi ku gbanansaagu jelibuoli tuona findima ki go kaani mi yanduanma, li juunli leni u taayenamu yantiali bi niba siiga.

- **I laabaali lieli** tuugi leni i nii balipuali (handiboli) jeligu biigicianma boginma bi puoba po ke bi yi laa jeligu “Dami Sone III”. Li baa tieni li binli 2026 ciyia ñmaalo nni Wagidugu dogu nni.

Li tie i nii balipuali (handiboli) bi puoba po, ki ba taani Afidi nintuali dogi nii (08). Li handunli nni, yaa cagicianli n gobidi handiboli jeligu, yaa càga n gobidi handiboli jeligu Afidiki nni leni Bulicina Faso nni n taani ki bogini laa jeligu.

Laa jeligu tie Afidiki hanbiboli balipuacianli boginma po yo. Li tie lan todi yaa puoba n ye laa jeligu nni n fidi ki bogini ñama ki go todi yaa tuginma n ye ti dogu leni handiboli jeligu gobidikaaba siiga n baa u paalu.

- **I laabaali taali** tuugi leni Bulicina Faso n den gedi Afidiki nni mi nuama jeligu biigicianma a nikipela po mi taabuama 24 po n cuoni màamà togida. Li den tieni li binli 2026 cimuu o dana 12 ki gedi o dana 17 Akira Gana diema nni.

Laa biigicianma po, Bulicina Faso den fidi ki sedi yaa kaanu n dagidi, ki ban juodi mi biigima ki tie u dogu niilu dogi 48 siiga ki baa i gàali màalima laani boni lie (02) ke laanyendu tie wula, lani n tie Nemata NIKIEMA biinu ke Malata Yasimini KOALA mo baa i ligi yaa laanu.

Yaala n go pugidi, Bulicina baa niba taa (yaaba n bàà ki baa biigi li ñandunli U20 jeligu biigicianma, lani n tie Salisa SONGO, Alen SAWADOGO leni Abiduli Risaari TARAWORE. Laa biigicianma baa tieni li binli 2026 cinii o dana 05 ki gedi odana 09 Esèni/Orego Ameriki diema nni.

Afidiki nni mi nuama jeligu a nikipela po tie biigicianma yaa cagili n gobidi mi nuama jeliti Afidiki nni n bogini yaama. Li baa taani mi niboandiema n pia yaaba ke bi fidi ki sani ki cie bi lieba ki go ki pugini laa gbanansaagu jeligu banma Afidiki nni.

Bulicina Faso kuama laa jeligu biigima nni den tie ki baa i jaandi gààli mààlima laani leni ki go bogini bi niba mi nuama jeligu po yaali n tie li ñandunli nni mi nuama jeligu biigicianma yaama n ba tieni li binli 2027 leni olenpiki jeliti biigima yaama n ba tieni li binli 2028 Losi Aselesi po

A Koanbàla táánli gààli yaaba n den kua ku jeligu nni leni ban fidi ki bàà yaa biini Afidiki nni mi nuama jeligu biigicianma a nikipela po ki go paagi bi pala ke ban ya suagi liigi leni laa moandili cine.

III. BAN DINI YAABA A BÁLA

III.1. BAN DINI YAABA A BÁLA YENDI YENDO TUONA NNI

A. YAA KOANBADIEGU N DIE MI DIEMA TINBUONA GOBIDIMA LENI A SANCENA TUONA KANI

- Ti lielo Teega-Wende Rodirigi **NANA**, o lanba li tuonli nni tie 304 114 C, o tie a tinbuona tuona gobidikoa, bi dini o li bali ke o tua Joro désiyon Yudaano tundikoa mi tuonbanma nni, ke o puogili tie wan yaa diidi o nisaalo n naaninni ki yaa pia u sanu ki tieni yaala a koana guunma leni a pegidima tuonjaali kani.

B. YAA KOANBADIEGU N DIE U LOAGU LENI I LIGI KUBIMA TUONA KANI

- Ti lielo Adama **FAYAMA**, o lanba li tuonli nni tie 239 628 E, o tie Bàaló ligidiedi goandikoa, bi dini o li bali ke o tua Bàaló ligidiegu Yudaano Gobidikoa
- Ti lielo Bègiboayawonni Purosipeeri **SONDA**, o lanba li tuonli nni tie 91 629 S, o tie Bàaló ligidiedi goandikoa, bi dini o li bali ke o tua Bàaló ligidiegu ligikubilo Gobidikoa yaa koanbadiegu n die ti diema leni dietoama siiga nantaadi kani ;
- Ti lielo Noweli **DABIRE**, o lanba li tuonli nni tie 210 699 N, o tie Bàaló ligidiedi goandikoa, bi dini o li bali ke o tua Bàaló ligikubiciamo Goandikoa;
- Ti lielo Idirisa **NANA**, o lanba li tuonli nni tie 272 948 X, o tie Bàaló ligidiedi goandikoa, bi dini o li bali ke o tua yaa koanbadiegu n die a biwaala cógú, ti máamaamáama cógú leni ti diema mabuoli findima ligikulo Goandikoa ;
- Ti lielo Jan **SINSONE**, o lanba li tuonli nni tie 46 263 C, o tie Bàaló ligidiedi goandikoa, bi dini o li bali ke o tua li lubigaali Yudaano

- Ti lielo Taajoa Mariten **KULIBALI**, o lanba li tuonli nni tie 112 470 G, o tie Bàaló ligidiedi goandikoa, bi dini o li bali ke o tua li cogidicianli« DEEN KANU » Ligikubilo;
- Ti lielo Sibiri **BITIBALI**, o lanba li tuonli nni tie 57 157 C, o tie Bàaló ligidiedi goandikoa, bi dini o li bali ke o tua yaa koanbadiegu n diidi bu kpaabu, mi ñima, li yanwubili leni mi ñima nni bonpiakàala tuona ligikubilo;
- Ti lielo Musa **NIKIEMA**, o lanba li tuonli nni tie 216 170 T, o tie Bàaló ligidiedi goandikoa, bi dini o li bali ke o tua li tuonli báama tuonsoandiegu Bulicina nni« Faso Tonlo Zì » ligikubilo;
- Ti lielo Añèsi **SUSANGO/SONGO**, o lanba li tuonli nni tie 46 220 G, o tie Bàaló ligidiedi goandikoa, bi dini o li bali ke o tua u báadogu máama tuona koanbadiegu Ligikubilo;
- Ti lielo Isa **SAÑON**, o lanba li tuonli nni tie 216 178 R, o tie Bàaló ligidiedi goandikoa, bi dini o li bali ke o tua yaa koanbadiegu n die i làabáali, ku maasuagu, i nii tagima leni yanluadi goada tuona leni yaa koanbadiegu n die ku gbanansaagu jeliti tuona, bi nipanba leni a tuona báama Ligikubilo;
- Ti lielo Jan Batisti **SEYIDA**, o lanba li tuonli nni tie 43 132 B, o tie Bàaló ligidiedi goandikoa, bi dini o li bali ke o tua yaa koanbadiegu n die ti diema leni dietoama siiga ñantaadi Ligikubilo;
- Ti lielo Isufu **WEDIRAWOGO**, o lanba li tuonli nni tie 57 172 E, o tie Bàaló ligidiedi goandikoa, bi dini o li bali ke o tua Bàalo ligikubiciamio ;
- Ti lielo Hamado **SEWOGO**, o lanba li tuonli nni tie 245 222 E, o tie Bàaló ligidiedi goandikoa, bi dini o li bali ke o tua Bàaló panli Yudaano;
- Ti lielo Emanuweli **SAWADOGO**, o lanba li tuonli nni tie 236 096 F, o tie Bàaló ligidiedi goandikoa, bi dini o li bali ke o tua Nakanbe desiyon Ligikubilo;

- Ti lielo Isa **YONABA**, o lanba li tuonli nni tie 46 226 T, o tie Bàaló ligidiedi goandikoa, bi dini o li bali ke o tua Ubiri désiyon Ligikubilo;
- Ti lielo Mabudu **KEKELE**, o lanba li tuonli nni tie 46 224 Y, o tie Bàaló ligidiedi goandikoa, bi dini o li bali ke o tua Giriko désiyon Ligikubilo.

C. LI GUUNLI KOANBADIEGU

- Ti lielo Wamedo Melèni Reyimon **WEDIRAWOGO**, o lanba li tuonli nni tie 46 777 N, o tie polisi komiseeri, bi dini o li bali ke o tua li tuoncagili yaali n faami li sancenṅanli pó lani n tie « ONASEERI » Tidianyudaano .

D. YAA KOANBADIEGU N DIE TI DIEMA LENI DIETOAMA SIIGA NANTAADI KANI

- Ti lielo Abiduli Wabu **DIRABO**, o lanba li tuonli nni tie 54 589 N, o tie Diema leni mi yama tuginma tuona tundikoa, bi dini o li bali ke o tua li koanbali todikoa ;
- Ti lielo Abidulayi **SONGO**, o lanba li tuonli nni tie 75 297 K, o tie Diema leni mi yama tuginma tuona tundikoa, bi dini o li bali ke o tua li koanbali todikoa ;
- Ti lielo Basinewendé Maritini Eliani **WEDIRAWOGO/GIYENGERE**, o lanba li tuonli nni tie 104 414 S, o tie Diema leni mi yama tuginma tuona tundikoa, bi dini o li bali ke o tua li koanbali todikoa .

E. YAA KOANBADIEGU N DIE I LAABAALI, KU MAASUAGU, I NII TAGIMA LENI YANLUADI GOADA TUONA

- Ti lielo Awa **KONPAWORE**, o lanba li tuonli nni tie 244 961 D, o tie mi laabaalitenma tuona tundikoa, bi dini o li bali ke o tua ku koanbadiegu tuona yankpaagidaano;
- Ti lielo Noweli **KONGO/SALUKA**, o lanba li tuonli nni tie 216 714 W, o tie ku maasuagu tuona tundikoa, bi dini o li bali ke o tua « **Ku**

maasugu » tuonboginkaana Yudaano ki lebini leni o bali yaali n tie ku maasuagu leni li bonñuadikàala jeliti tuona Yudanciamo

- Ti lielo Salifu **WARIMA**, o lanba li tuonli nni tie 220 278 V, o tie mi laabaalitenma tuona tundikoa, bi dini o li bali ke o tua, « **mi laabaalitenma** » tuonboginkaana yudaano ki lebini leni o bali yaali n tie mi laabaalitenma tuona Yudanciamo

F. U BAADOGU MAAMA TUONA KOANBADIEGU KANI

- Ti lielo Sésuma **SANON**, o lanba li tuonli nni tie 00 00 29 Z, o tie li bonmaakaala nannana tienma bando, bi dini o li bali ke o tua Li dièmááli leni i dociami tuona banda cagili(AKOMODI-BULICINA) Yudaano.

G. YAA KOANBADIEGU N DIE A COGIBIGBENGA CÓGÚ LENI MI BANCANMA LINGINMA TUONA KANI

- Ti lielo Belo **ADIOLA**, o lanba li tuonli nni tie 342 994 A, o tie mi lingima cogibicanbaa, bi dini o li bali ke o tua iniverisité cogu caga pegidiñoadima tuoncagili Yudaano.

III.2. BAN DINDI YUA YAA BÁLI

YAA KOANBADIEGU N DIE TI DIEMA TINBUONA GOBIDIMA LENI A SANCENA TUONA KANI.

A Koanbala Táánli dindi yaa tuonsoanlo yaa yeli n ŋua ne bali :

- Ti lielo Amedi **WATARA**, o lanba li tuonli nni tie **260 413 H**, ki tie tinbuona tuona boginma tidianlo, o bi tie Gosina déparitema Perefé, Nayala porovenso nni.

III.3. BAN DINI YAABA A BÁLA A TUONSOANJÀANA YÈLI PÒ

A Koanbála Tánli báa ban dini yaaba a bála a tuonjaana tuona boginma pò:

- yaa tuonsoandiegu n diidi mi diema nni bi niba coali leni bi yema n cuoni maama (IYENSEDE), u loagu leni i ligi kubima tuona koanbadiegu yèli nni.
- Bulicina Faso nni jilijili sani gobidima tuonsoanjaali (SOPAFERi-B), u báadogu maama tuona koanbadiegu yèli po.

A. YAA KOANBADIEGU N DIE U LOAGU LENI I LIGI KUBIMA TUONA KANI.

A Koanbála Táánli táá **másienkaama tili yenli** ki dini li báli ti lielo Barama **DAWO**, o lanba li tuonli nni tie **230 010 X**, ki tie a tuona kpaagibanda sanbila bando, ke o tua yaa tuonsoandiegu n diidi mi diema nni bi niba coali leni bi yema n cuoni màamà tuona boginma Gobidikoa Bàaló yèli po mi tagima tuonsoandiedi, u kpendu leni u nuu tuonsoanbanma tuona koanbadiegu (IYENSEDE) yèli po, o cicibáli bina taa (03) po.

B. U BAADOGU MAAMA TUONA KOANBADIEGU KANI

A Koanbála Táánli táá **másienkààma tili yenli** ki dini li báli ti lielo Usimani **SAVADOGO**, o lanba li tuonli nni tie **138**, o tie i ligi kubima leni i goandima tuona Tundikoa, ke o tua Bulicina Faso nni jilijili sani gobidima tuonsoanjaali (SOPAFERi-B) tuona boginma càgìli gobidikoa yaa cagìli n todi a kpenkpenda ke bi fidi ki kuandi bi ki ñandi ti tiakuadikaadi mi diema nni yèli po, o cicibáli bina taa po (03), o tua o joa Sayuba KIENDEREBEWOGO lebidu.



www.sig.gov.bf

Gufenema Máoagindo



Pengidiwende Silibeedi WEDIRAWOGO

O bàà Bàaló jaandi leni Tanjoa mààlima